

萬善同歸集卷第五

郡四

妙圓正修智覺永明壽禪師述

夫一念頓圓三德悉備未有一法能越心源設備萬行皆從真法界之所成或治習氣而用佛知見之所斷所為無成之成何妨妙行

亦四

不斷之斷豈闕圓修極惡違境尚為助發知識美德嘉善寧非進趣道乎問何不直明本際則本立而道生若廣述行門恐生迂滯答理為道本行為道跡因本垂跡無本跡何所施因跡顯本無跡本奚獨立故云本跡雖殊

不思議一也是知先明其宗方能進道若一向逐末實有所妨經云非不了真如而成其行猶如幻事等侶有而非真且圓根頓受之人則遮照而無滯即遮而照故雙非即是雙行即照而遮故雙行即是雙遣不壞本而

常末萬行紛然不壞末而常本一心恒寂問法句經云若能心不起精進無有涯何故立事興心而乖無作道乎答即心無心事不妨理作而無作性不闕緣故賢首國師云緣起體寂起恒不起達體隨緣不起恒起大集經

云佛言精進有二種一始發精進二終成精進菩薩以始發精進習成一切善法以終成精進分別一切法不得自性金光明經中雖得佛果精進不休故於眾中起禮身骨况餘凡下端拱成耶故十八不共法中精進無減

大論云菩薩知一切精進皆是虛妄而常成就不退是名真實精進問一切法空悉宗無相何陳眾善起有相之心耶答以諸法畢竟無所有故則有萬善施為若諸法有決定性者則一切不立故般若經云若諸法不空即

無道無果法句經云菩薩於畢竟空中熾然
建立金剛三昧經云若說法有一是相如毛
輪如焰水迷倒為諸虛妄故若見於法無是
法同虛空如盲無目倒說法如龜毛又經云
寧可謗有如須彌不可謗無如芥子論云諸
法實相中決定相不可得故名無所得非無
有福德智慧增益善根又云邪見人破諸法
令空觀空人知諸法真空不破不壞譬如田
舍人初不識鹽見貴人以鹽著種種肉菜中
而食問言何以故爾語言此鹽能令諸物味
美故此人便念此鹽能令諸物美自味必多
便空抄鹽滿口食之鹹苦傷口而問言汝何
以言鹽能作美貴人語言癡人此當籌量多
少和之令美云何純食鹽無智人聞空解脫
門不行諸功德但欲得空是為邪見斷諸善

群四

二

根廬山遠大師釋涅槃經問云若無所得云
何作善佛答明諸衆生現有佛性當必因果
如子在胎定生不久理須修善又問我今不
知所趣入處云何作善佛答有如來藏可以
趣入宜修善業弘明集云或有惡趣於空以
生斷見說之於口若同用之於心則異正法
以空去其貪邪說以空資其愛大士體空而
進德小人說空而退善良由反用正言以生
邪執矣不觀空以遣累但取空而廢善又善
惡諸法等空無相而善法助道惡法生障故

群四

三

知萬法真性同一如矣無妨因緣法中有萬
殊矣故經云深信因果不謗大乘三世因果
佛不誑欺十力勸誡聞當不疑而謂善惡都
空無損益乎夫法眼明了無法不悉舌相廣
長言無不實其析有也則一毫為萬其等空

也則萬像皆一防斷常之生尤蕪空有而除疾非聖者必凶順道者終吉勿謂不信有如皎日故中論云諸佛說空法為始於有故若復著於空諸佛所不化金剛三昧經云若離無取有破有取空此偽妄空而非真無今雖離有而不存空如是乃得諸法真無故肇論云若以有為有則以無為無有佛不有則無無也夫不存無以觀法者可謂見法實性矣何得以空害有以有害空乖一味之源成二見之垢乎並是依語失義遺智存情雖言破有未達有源強復執空罔窮空旨今畧辨之以消邪滯夫有是不有之有非實有空是不空之空非斷空若決定為有非是幻有而生隔闕若虛豁為空即同太虛而無妙用所以從緣而有無性故空無性之空空不闕有從

緣之有有不妨空有因空立成緣智而萬行沸騰空從空生起妙慧而一真虛寂豈同執但空而生斷見福海傾消據實有而起常心慢山高峙是以諸佛說空為空無明而成福業破偏計而了圓成愚人說空即生妄解而謗佛意增空見而滅善因又斷滅空則無善無惡無因無果第一義空有業有報不見作者問何不深入無生自然合道有為多過豈益初心答因世慈而入真慈從生忍而具法忍學分初後位豈濫陳又生即無生豈越性空之地無為即為寧逃實相之源但取捨情亡即真俗理見故經云菩薩不盡有為不住無為肇法師云有為雖偏捨之則大業不成無為雖實住之則慧心不朗華嚴經云解如來身非如虛空一切功德無量妙法所圓滿

故大集經云捨離大慈而觀無生是為魔業
厭離有為功德是為魔業問無漏性德本自
具足何假外修而虧內善答自有修性二德
內外二緣若性德本具如木中火不成事用
須假修德如遇因緣方能顯現是以因修顯

部四

四

性以性成修若本無性修亦不成修性無二
和合方備又內有本覺常熏聖種外仗善緣
助開覺智有內關外善提不圓華嚴經云法
如是故內因有本佛神力故外緣所加是以
若修萬善則順法性以淨奪染性德方起凡
夫雖具以造惡違性本性不顯不成妙用問
忘緣頓人教有明文今何所非而逐因緣法
乎答頓教一門亦是上根所受忘緣淨意真
為如實修行今所該者為著法之人而生偏
見一向毀事不了圓宗但析妄情豈除教道

部四

五

祇如見佛一法自有五等教人一小乘人見
佛身即是父母生身從心外來有相好分濟
意識所熏有所分別不知唯識義故見從外
來二大乘初教見佛但是現化非有相好然
其實體空無所有故云若以三十二相觀如
來者轉輪聖王即是如來三大乘終教見佛
相好光明一一悉同真性身即非身非身即
身理事無闕四頓教見佛無有始末之異何
有現應之差亦無相好可立一切分別非真
理故此離念之真名為見佛五一乘圓教見
佛即此離念之真非但不生彼相之理而乃
不閱萬像繁興具足依正該攝理事人法等
圓明一事徧於十方一切世界無不同時影
現猶如帝網又緣起一門若是頓教不說緣
起即是事相令真理不現要由相盡乃是實

性若說緣起如以翳眼而見空華若是圓教法界起必一多互攝有力無力方得成立一多無闕攝入同時名入大緣起如是五門皆是入路尚不訶小恐廢權門何乃斥圓而防實德台教云如大乘師不弘小教則失佛方便

便祇如古德設有邊辟之言皆是為物遣執今時但效其言固知其旨又全未入於頓門但妄生譏謗所失太過故今愍之故圓教華嚴經離世間品云佛子菩薩摩訶薩又作是念阿耨多羅三藐三菩提以心為本心若清淨則能圓滿一切善根於佛菩提必得自在欲成阿耨多羅三藐三菩提隨意即成若欲除斷一切取緣住一向道我亦能得而我不斷為欲究竟佛菩提故亦不即證無上菩提何以故為滿本願盡一切世界行菩薩行化

衆生故是為如金剛大乘誓願心是以驟緣遺性積雜染而為凡離緣求證沈偏空而成小緣性無闕即大菩提不離塵勞門能成無為種不溺實際海能隨有作波真俗鎔融有無不滯可謂履非道而達正道即世法而具

佛法矣問萬善威儀聲聞劣行迂滯化壘跬

伏草庵豈稱大心何成圓頓答三乘初學不愚於法所以法華經云若有比丘實得阿羅漢若不信此法無有是處又云汝等所行是菩薩道漸漸脩學悉當成佛皆是中途取證

釋四

六

起住著心是以諸佛所訶勸令起行且二乘之人皆登聖位超九地之煩惱斷三界之業身同坐解脫之牀已具神通之慧豈比博地具縛凡夫惟向依通全無修證故真覺大師云二乘何咎而欲不脩教中或毀或讚抑揚

當時耳凡夫不了預畏被訶寧知見愛尚存
去小乘而甚遠雖復言其修道惑使之所不
除非惟身口未端亦乃心由邪曲見生自意
解背真詮聖教之所不依明師未曾承受根
緣非為宿習見解未預生知而能世智辯聰

即四

七

談論以之終日時復牽於經語曲會私心縱
邪說以誑愚人撥因果而排罪福順情則熙
怡生喜逆意則憊懣懷瞋三受之狀固然稱
位乃儔菩薩初篇之非未免過人之譽又縈
大乘之所不脩而復譏於小學恣一時之強
口誇說之患鏗然三途苦輪報之長劫書云
古人當言而懼發言而憂又云止沸莫若去
薪息過莫若無語又如經說凡夫有漏散心
一稱南無佛乃至小低頭以此因緣尚成佛
道何況二乘無漏聖心永斷後有身親證人

空慧所習諸行而不登正位乎問有功之功
皆歸敗壞無功之功至功常存何乃棄不遷
之旨而迷有作之行乎荅肇論云如來功流
萬世而常存道通百劫而弥固經云三灾彌
綸而行業湛然今信之矣故知一毫之善雖

是有為若助菩提直至成佛而不墮壞任大
劫火競起終不燒虛空縱生死浪無邊實不
沉真善問諸法無體從緣幻生衆緣無依還
從法起緣法無性必竟俱虛無主無人無生
無滅如何廣輪無常之事相復說虛妄之果
報乎荅以真心不守自性隨緣成諸有雖侶
有即空乃體虛成事猶如樹影雖虛而有陰
覆之義還同昏夢不實亦生憂喜之情雖無
作者之能為不失因緣之果報故淨名經云
無我無造無受者善惡之業亦不亡又教所

明空以不可得故無實性故不是斷滅之無何起龜毛兔角之心作地足塩香之見問初心入道言行相扶萬善資勲不無其理果地究竟大事已終境智虛閑何須衆行乎答果得佛位畢竟無為若無邊行門八相成道皆是佛後普賢行收任運常然盡未來際維摩經云雖得佛道轉于法輪入於涅槃而不捨於菩薩之道是菩薩行華嚴經云了知法界無有邊際一切諸法一相無相是則說名究竟法界不捨菩薩道雖知法界無有邊際而知一切種種異相起大悲心度諸衆生盡未來際無有疲厭是則說名普賢菩薩問五度如盲般若如導今則偏讚衆行廣明散善乎答今所論衆善者祇為成就般若故教中或訶有為但是破其貪執如若取捨不生一切

釋曰

無聞若未明般若以萬行為助緣法華經云佛名聞十方廣饒益衆生一切具善根以助無上心華嚴經云譬如一切法衆緣故生起見佛亦復然必假衆善業若已明般若用衆行為嚴飾法華經云其車高廣衆寶裝校乃至又多僕從而侍衛之故云萬善同歸集離般若外更無一法如衆川投滄海皆同一味雜鳥近妙高更無異色或不謂般若但習有為祇成生死之因豈得涅槃之果若布施無般若惟得一世榮後受餘殃債若持戒無般若暫生上欲界還墮涅槃中若忍辱無般若報得端正形不證寂滅忍若精進無般若徒興生滅功不趣真常海若禪定無般若但行色界禪不入金剛定若萬善無般若空成有漏因不契無為果故知般若是險惡徑中之

釋曰

九

導師迷闇室中之明炬生死海中之智楫煩惱病中之良醫碎邪山之大風破魔軍之猛將照幽途之赫日驚昏識之迅雷抉愚盲之金鏡沃渴受之甘露截癡網之慧刃給貧乏之寶珠若般若不明萬行虛設祖師云不識

玄旨徒勞念靜不可刹那忘照率爾相違乃至成佛究竟位中定慧力莊嚴以此度含識故佛云我於一夜中間常說般若問諸法寂滅相不可以言宣何不直指其事而廣涉因緣興諸問答乎荅楞伽經云佛告大慧若不

說一切法者教法則壞教法壞者則無諸佛菩薩圓覺聲聞若無者誰說為誰是故大慧菩薩摩訶薩莫著言說隨宜方便廣演諸法故知捻持無文字文字顯捻持離理無說離說無理以真性普徧故不可說不異可說以

緣修無性故可說不異不可說若說四實性及諸法自相皆不可說若依四悉檀及諸法共相皆是可說是以諸佛常依二諦說法但得圓旨說即無過若一向無言何由悟解令尋言求理而之理圓但為言徧故云言說不

及不說無言又性雖離言不可說要以言說方會不可說也若夫履踐道源紹諸佛種先明般若以辨真心般若乃萬行之師千聖之母真心是群生之本衆法之源若般若未通真心由昧應須皈命一體三寶懺悔三世懋

瑕以尸羅而檢過防非用禪定而除昏攝亂親近善友讚誦大乘萬善熏治多聞修習助顯真性直至菩提障盡而妙定自明慧發而真心豁淨既能自利復愍未聞廣作福因具行諸度紹佛家業建大法幢注一味之法雨

蕩諸惑塵然無作之智燈照開迷闇是以功德萬行初後並興於諸佛教中法爾如是故華嚴經云菩薩摩訶薩不作逼惱眾生物但說利益世間事法華經云若人受持讀誦是經為他人說若自書若教人書復能起塔及

耶四

造僧房供養讚歎聲聞眾僧亦以百千萬億讚歎之法讚歎菩薩功德又為他人種種因緣隨宜解說此法華經復能清淨持戒與柔和者而共同止忍辱無瞋志念堅固常責坐禪得諸深定精進勇猛攝諸善法利根智慧善答問難乃至是人若坐若立若行處此中便應起塔一切天人皆應供養如佛之塔大凡善法略有四種一自性善無貪癡瞋等三善根二相應善善心起時心王心所一時俱起三發起善發身語業表內心所思四第一

耶四

十一

義善體性清淨又略有二種一理善即第一義二事善即六度萬行今時多據理善若是理善闡提亦具何不成佛是以須行事善莊嚴顯理積大福德方成妙身如鑛藏金佶山藏王若石蘊火猶地生泉未遇因緣不成濟用雖然本具有亦同無眾生三因亦復如是凡曰有心正因悉具未得緣了法身不成了因智慧莊嚴正解觀察緣因福德莊嚴妙行資發三因具足十號昭然自利利他理窮於此故法華經云我以相嚴身光明照世間一切眾所尊為說實相印又薄德少福人不堪受此法夫善根易失惡業難除涅槃經云譬如畫石其文常在畫水速滅勢不久住瞋如畫石諸善根本如彼畫水是故此心難得調伏故知善事易忘人身難得不可因循剎那

異世提謂經云如有一人在須彌山上以纖縷下之一人在下持針迎之中有旋嵐猛風吹縷難入針孔人身難得甚過於是又菩薩處胎經云盲龜浮木孔時時猶可值人一失命根億劫復難是海水深廣大三百三十六

一針沒海底求之尚可得又云吾從無數劫往來生死道捨身受身不離胞胎法計我所經歷記一不記餘純作白狗身積骨億須彌以利針地種無不值我體何況雜色狗其數不可量吾故攝其心不貪著放逸是以暫得人身於十二時中不可頃刻忘善刹那長惡此便難逢豈容空過又無常迅速念念遷移石火風燈逝波殘照露華電影不足為喻法句經云佛告梵志世有四事不可得久一者有常必無常二者富貴必貧賤三者合會

必別離四者強健必當死又經云非空非海中非入山石間無有地方所脫之不受死如上所明萬德衆善善提資糧惟除二法能成障闕一者不信二者瞋恚不信障未行善欲行善瞋恚滅已行善現行善以不信故如同

敗種永斷善根墮壞正宗增長邪見以瞋恚故焚燒功德遮障善提開惡趣門閉人天路又不瞋從慈而起大信因智而成智刃纔揮疑根頓斷慈雲既潤瞋火潜消是以因智度苦海之津因信入菩提之戶因慈住大覺之室因忍披如來之衣華嚴經云信為道元功德母長養一切諸善法信能增長智功德信能必到如來地信令諸根明淨利信力堅固無能壞信能永滅煩惱本信能專向佛功德信為功德不壞種信能生長菩提樹信能增

益最勝智信能示現一切佛大莊嚴法門經云瞋恨者能滅百劫所作善業華嚴經云菩薩起一瞋心能生百萬障門又經云劫功德賊無過瞋恚又意地起瞋大道冤賊問凡脩萬善皆助菩提云何有稽滯不成復云何速

邪四

十三

得圓滿答因放逸懈怠故無成因勇猛精進故速辨譬喻經云有一比丘飽食入室閉戶靜眠受身快樂却後七日其命將終佛愍傷之告比丘言汝維衛佛時曾得出家不念經戒飽食却眠命終魂神生蜈蚣蟲中積五萬歲壽盡復為螺蚌之蟲樹中蠹蟲各五萬歲此四品蟲生在冥中貪身愛念樂處幽隱為家不喜光明一眠之時百歲乃覺纏綿罪網不求出要今始罪畢得為沙門如何睡眠不知厭足比丘聞已慙怖自責五蓋即除成阿

羅漢大寶積經云佛言譬如綵帛繫在頭上火來燒綵帛無暇救火何以故究實理急此上一親明教旨豈敢造次輒有浪陳願導懇苦之言不違究竟之說問慈悲萬善深知佛業祖教或毀或讚所以生疑上雖廣明猶懷餘惑未審佛旨究竟所歸更希指南永祛積滯答祖立言詮佛垂教跡但破徧計所執不壞緣起法門徧計性者情有理無如繩上生蛇杙中見鬼無而橫計脫體全空依他性者即是因緣若隨淨緣即得成聖若隨染緣即乃為凡是以從緣無性故號圓成法華經云諸佛兩足尊知法常無性佛種從緣起是故說一乘論云若見因緣法則名為見佛故知無有一塵不合理事未有一法非是佛乘皆是不了萬法之初源一塵之自性遂生情

執滯相迷名妄分自他強生離合致令理事
水火競生各據二邊不成一味自翳眼見明
珠有類以執心觀萬善生瑕媼怒癡性邪見
非道尚為解脫之門尊崇三寶利他衆信豈
成障闕之事是以達之則瓦礫為金取之則
妙藥成毒故經云虛妄是實語除邪執故實
語成虛妄生語見故但除去取之情盡履玄
通之道見網既裂惟一真心塵翳若除無非
佛國故大般若經云佛言我以諸法無所執
故即名般若波羅蜜多我等住此無所執故
便能獲得真金色身常光一尋若欲無過但
理事融通行願相從悲智兼濟

萬善同歸集卷第五

題四

十四